

## Sēlkē so dvēm galvuom

Kū mes, pēnsininkā, dērbam?

Kas kāp ēšmana: kas dar pasabnos ēr kuoki darbieli dērbtē, vo kas – tik televizuorio karkintē besogeb. No, ta vēsuokiū blēdū prēsēklausa: ka dujēs brings, ka elektra pēgs, ontra dēina – ka brings ē rekordēškā!.. ka kas nuorintās pēgs, mes jau senē nebvierējem. Kāp sāka, pažadiesi – patiešīsi, netesiesi – negriešīsi. Vo kuoki če bieda?! Juk mes par ēlgiausius metus vēskuo matiem. Kol „kolkuozā“ ont kuoju atsēstuojē, kaimietis jouda bulvīnē sriebē, vo dounas ēr sovēsam trūka.

Vo dabā mes esam kāp puonā – valdiuos ēšlaikītēnē. Mums alga ein kuožna mienesi, ēš darba neatleis... Jegu biški ē notropēn – kēntam. Ēlgā esam muokītē tīlietē.

Noejēi i krautovē, neveizam i geriesni gabalieli – nosēperkam kuokē norašīta sēlkē. Kāp sāka – bulviu, sēlkēs, rūgšta pēina kertam beveik kuožna dēina.

Bet anou karta aš parsēnešiau veina sēlkē so dvēm galvuom. Tik če nebova nikuokēi dīvā. Ta vargšē pardaviejē dērb sunkē, vo anuos algelē būs besonti mažesnē ēr ož kēta pēnsininka pēnsējē. Tad ana tou sēlkē sovalgē, vo kor dies kramelē?.. Pakēša pu apatē kētā sēlkē, ēmetē i skrabēnē, apvīniuojusi ēšspausdēna kaina... vo aš ē parsēnešiau nosēpērkusi. Nuors ni biški dēl tuo nezlastiejaus, kāp Patackis diel siemušku. Mon patē nereikiejē valgītē tuos kramelēs – aš torio katinieli. No, ēr gerā vedom abodom papoulē.

Alē atruoda, ka mūsa valdiuos veiksmā – kāp ta sēlkē – so dvēm galvuom. Je vēina saka nē nē, ontruoji – tēp tēp.